




O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

SETEMA 2015

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

\$824,150 Mai le Mafutaga a Tina mo Faamalama o le Iupeli

O LE taeao o le Aso Lua, 1 Setema 2015, na tau'a'oina atu ai e le Mafutaga a Tina o le tatou Ekalesia, le latou fesoasoani mo le Malumalu Iupeli i Malua, e valu selau luasefulu ma le faafe, selau lima sefulu tala, i le Ta'ita'ifono o le Ekalesia, Susuga i le Toeaina Faatonu ia Tavita Roma, i se feiloa'iga i le ofisa o le Ta'ita'ifono i le

p.2



Mum!:

O se tala mo Tina
itulau e 13

O LE ATA o e na auai i le tau'a'oina o le \$824,150: Laina i luma mai le itu agavale - Maima Faauga Mata'utia o le failautusi, Ta'ita'ifono o le Ekalesia Susuga Tavita Roma FT, Kuinimere Eti Tamati o le Sui Taitaifono Mafutaga a Tina, Sui Taitaifono o le Ekalesia Susuga Tauti'aga Senara FT. Laina i tua- Failautusi Aoao o le Ekalesia Susuga Afereti Uili FS, Su'eala Koon Wai You o le ofisa o le Mafutaga a Tina, Pereise Viki o le teutupe a Tina, ma le Teutupe a le Ekalesia, Susuga Rimoni Wright FS.

O le Mafuaaga o le pese:
All Hail the Power

faaaauau itulau e 14

Agelu!

Sa ou nofonofu i lo'u faamalama
ma ou mata'ia tifiga a le manulele
faaaauau itulau e 10

O le Tauvalaau a le
Alofa Taumulimuli

faaaauau itulau e 11

Iapesa o se Fuafanua

Saunia e
Rev. Samasoni A. Moreli

Jabez as a land surveyor.

1 Nofoaiga Tupu 4:9-10: “E, fia manuia a’u ia te oe ma faalauteleina lo’u laueleele, ia ia te a’u lou ‘a’ao ma ia e leoleo mai ia te a’u ai le leaga, ina ne’i tigaina a’u.”

Faatomuaga:

O le faamoemoe o leni pepa o le fia suesueina lea o le tala ia Iapesa atoa ma lana tatalo, aemaise o sona fesoota’iga i gafa o Isaraelu (Sa Iuta), e pei ona faamauina i le 1 Nofoaiga Tupu 1-9. E auau leni pepa i le taua o fanua ma gafa ma le uiga o le oso faalava o le tala ia Iapesa (1 NT4:9-10)), i totonu o nei gafa. E fia faapipii atu i leni suesuega se fesootaiga o leni tala/tatalo a Iapesa ma le mataupu tau mopili (mobility) aemaise o sona aafiaga i le soifua faatuatua o o tatou

tagata i leni vai tau ua tatou iai.

E tulaga ese foi le tala ia Iapesa mai le tele o tala o le Feagaiga Tuai. E le gata o se tala puupuu (lua fuaiupu), ae ese foi le ituaiga tusitusiga o le vaega lea pe a faatusa i le (1 Nofo.Tupu 4:9-10), pe a faatusa ile 1 N.T. 1-9. E seasea foi ona afea ma ta’ua leni tala i lauga ma a’oga, ona o le laititi o faamaumauga o loo i le Tusi Paia. A o se tatalo foi o loo tele ina faaaogaina e nisi tagata fai pisinisi e saili ai a latou ‘oa ma manuia. I leni suesuega, e fia pa’ia ai le taua o leni tala, i manatu o nisi o le au suesue o le Feagaiga Tuai. Mai leni suesuega, ua le manatu ai le pepa o se tala oso vale le tala ia Iapesa, a o se tala oso faalava. E oso faalava aua ua le sosolo lelei ai le faitauina o gafa o le ituaiga o Sa Iuta; ae le osovale foi, aua atonu o loo iai se fesootaiga o leni tala ma gafa/tofi o Sa Iuta (Isaraelu). E ‘auga le tala i le tatalo a Iapesa,

ma o iina foi o loo tau vavala mai ai, le fua faa-Iapesa i gafa ma fanua o Sa Iuta, e pei ona manatu iai leni suesuega.

O le Vaaiga Faalotoifale o le 1 N.T. 4:9-10

Ua mapu ane i fanua le nuu mai le tafeaga. O lagona masani o le fiala ma le olioli, e le gata ua tau lau o le faamoemoe ina ua tuvae i eleele ma tofi, a ua saoloto foi mai le pulega a nuu ese (Papelonía). Peitai, e tele foi nisi tuatano’a e ao ina faaleleia ma teuteu i lo latou lotoifale.

Muamua, ua toe tau faaolaola ana tapuaiga ma talitonuga, ua amata ona mou malie atu talu le tafeaga.

Lua, ua toe fia vaevae tonu eleele ma fanua na tuua talu le tafeaga. Ua fia faata’oto le faafanua e iloga ai eleele o ituaiga e sefulu ma le lua o Isaraelu. O le mafuaaga lea o le toe tala o gafa o ituaiga o *faaauau itulau e 4*

\$824,150 Mai le Mafutaga a Tina mo Faamalama o le Iupeli

mai le itulau muamua

Ofisa Tutotonu o le Ekalesia i Tamaligi, Apia. O lea tupe tele e mo faamalama o le Iupeli fou i Malua o loo fausia nei.

E le o se taimi muamua lea ua faatino ai e le Mafutaga se foa’i tele faapea, mo galuega lava a le Ekalesia o le Malumalu Iupeli i Malua. O le masina o Iuni i le tausaga nei lava, na foa’iina ai foi e le TPT (Tautua Puapuaga o Tagata), o se vaega o le Mafutaga a Tina, se tinoitupe e \$500,000 tala, e fesoasoani i le galuega i Malua o le Malumalu Iupeli fou. A tuu faatasi foa’i ia e lua, ona tulai

mai ai lea o le tupe ua tuuina atu e le Mafutaga a Tina o le Ekalesia mo le Iupeli fou i leni tausaga, i le Tasi le Miliona, Tolu Selau Luasefulufa Afe, Selau Limasefulu Tala - \$1,324,150 Tala.

O nisi foa’i ua faia e le Mafutaga a Tina e mo le Falema’i Faamama Toto, e masani lava ona \$50,000 tala.

Na saunua le Taitaifono o le Ekalesia Susuga i le Toeaina Faatonu ia Tavita Roma, ma ia ta’ua le upu mai le Faataoto a Solomona 31:30: “O le matagofie e pepelo lea, **o le mea faatauvaa le lalalei**; a o le fafine ua mata’u i

le Alii, e viia lava o ia.” Na ia ta’ua lima alofa ma ‘a’ao lelei o tina ia latou galuega alofa o fai mo le Ekalesia. Ma ia faafetaia le Mafutaga a Tina ona o le latou fesoasoani pea lava pea i galuega atia’e a le Ekalesia i taimi e manaomia ai le latou fesoasoani. “Ua leva ona galulue tina i le aao alofa e lagolago le Ekalesia”, na saunua ai le Taitaifono o le Ekalesia. “Ma o le tatalo a le Ekalesia, ia manuia le Mafutaga a Tina.”

Na saunua foi le Sui Taitaifono o le Mafutaga a Tina le faletua ia Kuinimere Eti Tamati ma ia ta’ua faapea, “O le agaga faatina, e tumu i le alofa.”

Saunua foi le Sui Taitaifono o le Ekalesia le Susuga i le Toeaina Faatonu ia Tauti’aga Senara, “E ofo le loto - ua le tasi pe lua, e ese lava le alofa faa-tina ua molimau iai le Ekalesia. Faafetai alofa i le Atua ma le Ekalesia.....”

O LE LAUGA

Saunia e Rev. Faito'aga Tolua

F. Tuai: Kenese 1: 9 – 12,
F. Fou: Ioane 21:25

Matua: *“Ua fetalai mai foi le Atua, Ia potopoto i le mea e tasi o vai i lalo o le lagi, ia iloa foi le eleele matutu; i le ua faapea lava. Ua faaigoa e le Atua le eleele matutu, O le eleele, a ua faaigoa e ia le faapotopotoga o vai, O le sami; ua silasila atu i ai le Atua, ua lelei.”*

Manatu Autu: **O LE ATUA SILASILA LELEI**

O le tala i le foafoaga, ua tatou iloa ai le mata'isau o le Atua; le Matua o Faiva, e fetalai atu ia i ai lea ma lea, ona tula'i mai loa lea. O le Tufuga ma lana faatufugaga, i lana lava pule ma lona mana ma lona alofa, na Ia faia ai le lagi ma le lalolagi i le amataga.

O le foafoaga a le Atua, o le galuega na muamua ona fuafua lelei. Na amata i lona faataatia o le ata po o le fua (plan). E lē o se lalolagi na fausia faafuase'i, ae o se foafoaga na fuafuaina lelei, mo se taimi umi e talafeagai lelei ma lona finagalo, e ala i le gasologa faanatura o mea. O le isi lea uiga o le faaupuga a le tusitala o Kenese, *“na fegaoioia'i foi le Agaga o le Atua i le fogatai.”* Na muamua ona galue le Agaga o le Atua e fuafua, e saili se ata ma se fua talafeagai lelei, mo lana foafoaga a fai.

O fesili masani pe a tusi le ata ma le fua, O a mea o le a fai? O a ona foliga vaaia, o le a le umi, lautele ma le Ua i ai o tatou laueleele ma fanua, o loo i ai o tatou nuu ma aiga, ua tatou nonofo ma mautu ai. Ae maise ua i ai lau EFKS, o lou tofi lena ua foa'iina

faapitoa e te tapuai ma auauna atu ai i le Atua. O le tofi e i ai faatasi ma lo tatou tiute, o le galuega ua tuu mai i ou aao ma o'u lima, ia silasila lelei ma tausii faamaoni mea ua foa'ifuaina mai e le Atua. Ia tumau lona mamā, e paia ma matagofie, ia maloloina faaletino ma faaleagaga. Ia tumau lona lelei, e leai se ila, se pona poo se manuminumi e i ai.

“Ua fetalai mai foi le Atua... i le ua faapea lava.”

Ua ta'ua le mata'isau o le Atua, i lona silasila lelei, a o le'i amataina le foafoaga. Ae sili foi ona mataina lea silasila lelei o lana faautaga, i le taimi tonu ma le aso e tatau ai ona faatino le foafoaga. E le'i finagalo o Ia e faanatinati, e le'i finagalo e faatelevave. Auā e tele faafitauli i fuafuaga e soona natinati, ina ua mana'o i le fia vaai vave ua tino mai se faamoemoe.

Na mana'o Tavita e fau se fale mo lona Atua, ma ia fau loa i lona taimi, i lana nofoaiga; ia vaai atu i ai a o ola o ia. Peita'i o le finagalo o le Atua, ia 'aua le faanatinati, e sau taeao, e sau le isi augatupulaga, ona faatino lea o lona faamoemoe. E lē o le faatelevave.

Ae le'i finagalo foi o Ia e faafualeva pe faatuatuai ana fuafuaga. Auā e faapea foi ona tele to'atuga e tula'i mai, pe a tosotosololoa ma faalevaleva ae lē faia.

A o i ai Israelu i totonu o Aikupito, na finagalo le Atua e fa'aalu fuafuaga mo lona nuu. Ua uma ona tapena mea uma, fia faagasolo le galuega mo le faasa'olotoina o le nuu, ae taofiofi e le tupu o Farao. Fiu Mose ma Arona e tuualalo, fautua, talosaga e tuu atu le nuu e o, o fuafuaga a le Atua fia faatino. Ae tosotoso ma

faatuatuai e Farao, e ese foi lana faatatau, o loo fua i lona mana'o, i mea e malie ai lona loto ma manuia ai lona malo Aikupito. O le a le mea na i'u i ai?

Na faatino lava le finagalo o le Atua, na i'u lava ina alu le Esoto ua sa'oloto mai le mea sa nofo pologa ai. Ao laufanua o Aikupito, i ona laueleele ma ona vai, o mea na tutupu ma ola ai, na matua faaleagaina i mala e sefulu, na auaua'i mai e le Atua.

Se a lona uiga? E tāua lo tatou iloa o fuafuaga a le Atua fia faatino, ma tatou usitai i ai, tatou te olo le fua ma lolo ni o tatou mana'o, ae ave le faamuamua i lona finagalo. Ne'i ave i tatou ma tagata e faatuatuai ai ana fuafuaga fia faagasolo, ae pa'u ifo ai ni mala i o tatou luga, e pei ona sa tupu i Aikupito.

O le Atua lava ia, e silasila atu ua lelei. Na te silafia ua tatau ma onomea le vaitau ma le taimi, ua fetau ma talafeagai lelei le taeao ma le aso, ona faatino loa lea. Ona fetalai loa lea o Ia, ma faapea lava ona tino mai. E silasila ua lelei, ma fai loa. Auā e le tasi se feau, e tele isi galuega fia faatino o le foafoaga, e tele isi galuega o faatali mai, auā se manuia o le tagata, e 3 au au i ai mea uma na faia.

“Ua silasila atu i ai le Atua ua lelei.”

Molimau le au fai Evagelia, e tolu tausaga na fai ai le galuega faaola a lo tatou Alii o Iesu. Mai lona papatisoga, sosoo ma lona faaososoga, ma faasolo loa lana galuega, e pei ona sa amata i le valaauina o ona soo, feafioa'i i Iutaia, Kalilaia ma *faaauau itulau e sosoo ai*

O LE LAUGA

Samaria, e a'oa'o ma tala'i le malo o le Atua ua oo mai. Na faamalolo i ma'i eseese, tutuli ese temoni, e oo lava i e na oti na ia toe faaola ma faatuina mai.

Ae fai mai Ioane, "*O isi mea foi e tele na faia e Iesu, afai e tusia uma lava, o la'u taofi e le mafai ona ofi le lalolagi i ia tusi pe a tusia.*" E le na o le pau ia o mea na faia e Iesu, o loo tusia i le Tusi Paia. Ae ua lava ma totoe ia mea, mo le umi e ola ai soo se tagata, e faitau ma su'esu'e, ma iloa ai le silisili ese o lona alofa. Tatou te le gafatia ona faitau, o ana galuega mamana uma pe a tusia.

A o mea uma na faia e Iesu, o loo manino ai le Atua foafoa, e silasila atu ua lelei. O le faigaluega sa saunia lelei lona tagata atoa mo soo se feau ma auauunaga e valaauina i ai. E saunia lelei lona loto ma lona agaga, ina ua amatamea lona alofa e puna a'e ai, le alofa naunau ia ola le isi tagata. E saunia lelei lona mafaufau, ina ua a'oa'oina lelei ma aunoa ma nisi manatu e faalavelave pe lualuagia ai lana auauunaga alofa. E faapea i lona malosi faaletino, o lona tagata atoa o le mea faigaluega, e ofoina atu atoa, ina ia manuia ma ola le tagata agasala.

O le tauluga o le foafoaga a le Atua, na Ia fetalai ane ai, Ina tatou faia le tagata i lo tatou faatusa, ia foliga ia i tatou. O lona finagalo, ia foliga la tatou vaai i lana silasila, i soo se mea tatou te faia. Ia soo la tatou vaai i lana silasila, ma lana galue, i soo se auauunaga, o le a le tofi o le a le tiute e valaauina ai i tatou. Ia vaai ma le alofa, vaai ma le faatuatua, vaai ma le usita'i i lona finagalo. A o le tauluga o le galuega a Keriso, mo le foafoaga fou o le tagata agasala, na tauluga i ona puapuaga. Na maliu fa'atautau i le satauro, na tu'ia ai ona aao i fao ma lona itu i le tao. Na maliu tiga o Ia, a o silasila atu i ai lona Tamā, *ua silasila atu i ai ua lelei.*

Malo faafetai le Ekalesia i le tele o galuega ma atina'e tetele ua faia mo le Alii. O au faiga taulaga o loo faatupe ai, o le faatofalaiga o fuafua ma fai ai tonu, o le faatinoga o galuega ae maise le tapuaiga. Ae fia fai se tuualalo e ala i lenei feau o le Tala Lelei, ona ua feoloolo foi nai nisi atina'e ma galuega ua lapelapea, ona o le silasila ua lē lelei, ua lē mamao, ua lē loloto - ua lē silasila faaleAtua ae ua faatagata. O nisi galuega e le'i atoatoa ona tapena i

ona itu uma e tatau ai. O nisi galuega ma fa'ai'uga ua atagia ai le alofa faailoga tagata ma le fai vaega, ae ua lē o le alofa faasafua o le Atua mo tagata uma. Ua faanatinati nisi galuega i le mana'o vave nei i ai. Ae ua tosotosololoa nisi fuafuaga ua leva ona pasia, ae lē toe faatinoa ona o le finagalo o se toaitiiti, ua sili atu nai le Fono Tele.

O le silasila a le Atua e lelei; na te silafia le mea e leaga ma sesē, ona fautua lea ma a'oa'i mai. E ao foi ina faapea le silasila a le tagata faatuatua. E iloa o le a pa'u atu le Ekalesia i puapuaga, ona fautua lea ma toe liuliu le faautaga. E mata'u i le Atua, ae lē fefe i tagata. E tele pea atina'e ma galuega o i luma, ma e mana'omia lava ni ta'ita'i ma ni tagata faatuatua e silasila lelei faaleAtua. Afai foi ua lape nisi fuafuaga ua tuana'i, e a'oa'o mai e faalelei ai le aga atu i luma, faatasi ma le agaga salamō moni, ma faatuatua pea i le Ao o le Ekalesia, na te lē tuulafoa'ina lana foafoaga na fai.

Ia i le Atua poto e toatasi lona viiga.

Amene.

Faitoaga Tolua FS

Iapesa o se Fuafanua

Israelu pei ona iai i le Nofoaiga Tupu muamua, sei faamanino a latou aia tatau ma le pule i fanua nei.

Tulaga o le Tala ia Iapesa (1 N.T. 4:9-10) i Gafa o Isaraelu (1 N.T. 1-9)

Ua faatomua e le tusitala o le 1 N.T. gafa o Isaraelu, i gafa o Atamu ma lanafanau (1 N.T. 1:1-7), faasolo mai ai ia Noa ma lana fanau (1N.T.1:8-33), ona faaii lea

i gafa o auga tama o Isaraelu ma ituaiga o Isaraelu seia oo ia Tavita(2-9). Ona o le upu Atamu e iai lona uiga fesoota'i ma le tagata ola (adam/humanity) faapea fanua/elele (adamah) e pei ona fai ai e le Atua le tagata/adam, e manatu ai nisi o le tupuga o Isaraelu i le Nofoaiga Tupu, o se ata faatusa foi lea o le fesoota'iga o tu/gafa o soo se tagata soifua (humanity) ma ona fanua faapea foi ma ona atua (deities). Ua lagolago

e lea manatu se isi aoaoga taua a le Nofoaiga Tupu e ala i gafa nei, o le ta'u aofia o tagata uma (inclusiveness); o le fefaalagolagoma'i (interdependency), ma le ola fesootai o le tagata ma le natura o mea, e pei o gafa ma fanua, ma ua aumai ai se ata o le fesootai lelei o le tagata ma ona elele.

I totonu o le gafa umi o le Ituaiga o Iuta (1N.T.4:1-23), o loo oso faalava ai ma le tatalo a Iapesa mo sona piitaga i lea gafa, ma ia fanua. O lona tulaga lea i le vaai lautele. O se faatauana ma se olega mai

faaauau itulau e sosoo ai

Iapesa o se Fuafanua

mai le itulau e 4

se vaega toaitiiti, faatusa i le gafa umi ma le toatele o auga tupulaga o Isaraelu i le (1 N.T. 1-9).

O ai Iapesa?

E tele finauga o fai aga'i i lenei fesili. E manatu nisi o Iapesa o se Sa Iuta lava, a o se ituaiga ua galo pe ua leiloa lona faasinomaga (forgotten identity/tribe). O se ituaiga sa soifua ma ola ane i le aai paia, ae fai si maotua o lo latou tupuga, faapea o le ituaiga na soifua a o le'i soifua mai Aperaamo, pei o tagata Keni (Kenites).

O le faamaoniga o lea manatu, ona o loo taua Iapesa o se aai i totonu o Iuta e pei ona iai i le mataupu e 2:55. E le gata i lea a o loo ta'ua foi i le fuaiupu 9, e iai ona uso (ua sili le mamalu o Iapesa i ona uso). O pine faamau ia o sootaga o Iapesa i tagata Sa Iuta, faapea eleele ma fanua. O le aai sa nonofo ai Tusiupu o le nuu o le Atua. E peiseai o se itu tagi (appeal) lea finauga, o loo faapea mai o Iapesa, o se suli moni, a o lana tatalo i le Atua, o loo faaleo mai ai lagona o se ituaiga, ua tauau ina galo i gafa ma le vaevaeina o eleele o Sa Iuta.

Peitai e malosi foi le finauga mai faiaoga o le tulafono Iutaia (Rab-bis), faapea o nisi tagata suesue o le Feagaiga Tuai, o Iapesa o le tagata ese. E ui foi ina taua Iapesa i isi lomiga faapea sa faatasi ma Ieremia ma Kaletaia, o ni tagata amiotonu ma le faatuatua a o faatafea le nuu i Papelonia, a o ia lava o le tagata ese, aua e le o ta'ua lona igoa i le gafa o Iuta. O le ta'ua ai o le igoa o Iapesa i le mataupu e 2 o se aai na nofoia e tusiupu, ua na o se faaupuga, e ta'u mai ai tiute ma faiva sa feagai ma Iapesa i totonu o fanua o Sa Iuta.

O lona uiga, o le tatalo a Iapesa e tusa ma le finauga, o se ole

faatauanau a se tagata ese, i le Atua o Isaraelu ina ia taulia o ia i fanua o Sa Iuta, e ui e leai sona piitaga i le gafa o le nuu o le Atua. O se tagata ese ua finau ina ia le gata fanua na o Sa Iuta; a ia faalateleina. Pe au, pe le au i le gafa o Sa Iuta, o se naunautaiga, ia taulia atu ma ia.

O le a Iapesa?

E felata'i i le gagana Eperu le upu Iapesa (Jabez) ma le upu tiga. E mafai ona faapea se manatu, o le upu Iapesa ma le upu asepa e omai i le auaiga o mataitusi e tasi (consonants), a ua fela'ua'i mata'itusi, ua foliga ai e tutusa le faaleoina, ae eseese le uiga o ia upu i le gagana Eperu. O loo manino i le Tusi Paia le uiga o le upu Iapesa, e tusa ma faamaumauga, o le 'faatupu tiga', e pei ona faaigoa ai e lona tina. Ae a fua i mata'itusi faaaogaina, ma uluai uiga e pei ona ta'ua i luga, o Iapesa e foliga e tiga, ae le tiga lona uiga. O le uiga foi lea o loo faaaogaina ai e le Kenese3:16, le asepa/tiga, faatatau i se fafine fanau, ua tiga matua tiga lava, ae mulimuli ane ua galo, ina ua fanau mai.

E leai se faamoemoe o lenei pepa e tau saili poo sa'o le uiga o Iasepa e pei ona aumai e le 1 N.T.4:9-10, ae manatu lenei suesuega, o le uiga lea o le tatalo a Iapesa: Ua le o se tatalo ina ia liliu lona igoa, a o le faatauanau ina ia liliu le uiga o lona igoa na faaigoa ai o ia e lona tina. Ia taunuu manuia o le Atua ia te ia, pe Sa Iuta pe tagata ese ua le afaina lea. Na pau lana finauga ia fua mai e le Atua manuia nei ma na faalatele ona laueleele.

O se mana'o/tatalo ua le fuaina i faia ma sootaga masani faa-Eperu pei ona sau ai gafa; ua le fesiligia foi Iuta ma ta'ita'i o le nuu e pei ona sa faia e isi, mo ni o latou eleele ma fanua, aua lafo le fua i

le Atua.

“E, fia manuia a'u ia te oe ma faalateleina lo'u laueleele, ia ia te a'u lou aao ma ia e leoleo mai ia te a'u ai le leaga, ina nei tigaina a'u.”

E tolu ni upu e fia faamamafaina i lenei suesuega:

1. Faalatele (ravah). I nisi vaega o le Feagaiga Tuai o loo faaliliu ai le ravah o le faaolaola;

* Ken. 17:20 - na faauluola e le Atua Isamaeli

* Ken 26:4: na faauluola e le Atua Isaako

* Lev. 26:9: na faauluola e le Atua Isaraelu

* Ese. 36:10: na faauluola e le Atua tagata

E tau vala laitiiti le ravah'faauluola' ma le ravah 'faatele, e pei ona faaaogaina e le Esoto 7:3 - na faatele e le Atua ona vavega ma faailoga ia Farao ina ia talitonu Farao ma tuuina atu le nuu e o). E ui i lea eseese laitiiti i lona faaaogaina o le ravah, e tutusa uma nei faauigaina (faauluola ma le faatele), pe a tuu i o latou tulaga i le gagana faasino upu (tense) e pei ona aumai ai i nei tusitusiga, i le gagana Eperu. O le ravah e faama'ite e le Atua i lana pule faitalia. Ua iai le mana'o ma ua faaleo e ala i le tatalo, a ua lafo pea e pule mai le Atua.

A tuu i le faaaogaina e le 1 N.T. 4:9-10, ma le tatalo a Iapesa, e le mafai ona faauluola ni fanua, pe faatele foi, e tusa o lona mana'o. A o le fua lea faa-Iapesa, i eleele nei o Sa Iuta. O lona piitaga foi lea i gafa o Sa Iuta. E le mafai e lona malosi faale-tagata, ona maua ni ona eleele, ma faatau lona gafa i Sa Iuta, ae alofa mai le Atua ma na faia - faatupu, faatele, faauluola ma faalatele, ina ia faateleina foi ona tiute ma tofi mo le manuia o nisi tagata ua leai ni eleele, ona o le leai o ni faia.

2. Lou aao ua faauigaina o le augani mo le pule ma le malosi e aumai e le Atua; o le aao/pule e le

faaauau itulau e 10

IOANE KALAVINI

O LE APOSETOLO A'OA'O ATU

O se Talosaga mo le 'au Maturo

E tele aai o isi atunuu na malolo iai Kalavini i lana malaga atu i sona lafitaga fou. Ua taunuu nei i Pasele (Basel) i Suiselani, mamao lava i totonu o atumauga o Suiselani. O ina foi ua faamautu iai lana uo o Nikolasi Kopo. O le aso na taunuu ai Kalavini, o Ianuari 1535. I lea vai taimi e le'i iai se mana'o o Kalavini mo ni galuega faalaua'itele pe galue foi i le galuega a le Atua; tasi lava lona mana'o i ia aso, o le su'esu'e ma tusi ana tusi. O Pasele o se aai filemu ma e tau le iloa e nisi, na faato'aina e tagata Siamani, ma e mamao ese ma le vevesi o le aai o Paris.

Ua maua e Kalavini tala e faapea o lana uo faatau'ie, (o le na faalafiina o ia a o tusia lana tusi muamua), ua susunu olaina. Toetoe a pe le fatu o Kalavini i lenei tala faanoanoa. A o le taimi lea na ia amata tusia ai se tusi e ta'ua o le "Pulega Faale-Lotu Kerisiano".

O le lomiga muamua o lea tusi e le'i faia ona ia faamalamalama ai pe ofoina atu ai ni mataupu silisili faa-Porotesano, e ui lava sa iai ni faatonuga. A o le mafuaaga na tusia ai e Kalavini o le fia faamamaina lea o igoa o le 'au maturo mai tuua'iga na fai aga'i ia i latou ia na susunuina, "o lo latou oti e taua i le silasila a le Alii". (Salamo 116:15: "E silisili i le manatu o le Alii le oti o ona tagata amio Atua.") Ma le isi, o le fia talosaga lea i isi malo ina ia taofia le fasiotiga o i latou o loo manatu le lotu e tetee i a'oa'oga a le lotu.

O le masina o Aokuso 1535 na mae'a ai le lomiga muamua. Na o le ono ona mataupu, ma o le fa o

ia mataupu o ni a'oa'oga mo Porotesano e uiga i le tulafono, o talitonuga tau i le Atua, o le Tatalo a le Alii, ma le mataupu e tasi e vaeluaina i le Talisuaga a le Alii ma le papatisoga. O mataupu e lua o toetoe o manatu faaali lea o loo finau mai ai pe aisea ua tatau ai ona toe fuata'i le Ekalesia. Sa faaaauu pea ona faaopoopo e Kalavini nisi mataupu ua tumu i manatu loloto e uiga i mea ua mae'a ona ia tusia i isi mataupu. Na manatu le Ekalesia Katoliko e ogaoga lava tuua'iga ua fai e Kalavini aga'i i le Ekalesia, o lea na latou susunuina ai se kopi o lea tusi i se sauniga na faia i le malumalu ta'uta'ua o Notre Dame. A o ona po nei, matua fiafia lava le 'au a'oa'o o le Tusi Paia i le lomiga mulimuli o le tusi.

Ou te fia faasino atu le mafuaaga sa oso a'e ai pea ia Kalavini ia mafauaaga. Sa ia faamamafa lava le toe fuata'i, ae le o le fouvale. E le'i mana'o lava o ia e ta'u o ia o se tagata fouvale, e ui lava sa tuuaiina e nisi o ia i ia uiga. O le talitonuga o Kalavini o se fouvalega, o le fia faatupu lea o se mea fou. O le mea foi lea na ia matua faamamafa ai lava, o le faatuina o se lotu fou, e le o lona faamoemoe lea. Sa ta'u e ia o ia o le tagata toe fuata'i ona o lona faanaunauga e toe fuata'i mea ua leiloa. Na mana'o o ia e toe ta'ita'ina mai le Ekalesia i lana uluai misiona pa'ia, ma o le mafuaaga lea o ana tusi na lolomi.

O le tausaga e 1536 na lolomi ai i Pasele le lomiga muamua o lana tusi. Na lafoina se kopi o lea tusi i le tupu o Faranisisi I, ma se tusi (letter) o faamatala ai uiga fasioti tagata o Faranisisi, ma lagolagoina ai e Kalavini galuega na faia e maturo na susunuina.

E leai ma se isi i Pasele na ia iloa

o Kalavini na tusia le tusi, aua e le'i iloa foi e tagata o loo i Pasele ia Kalavini. Sa nofo ai i lea aai a ua sui lona igoa ia Martinasi Lukanasi (Martianus Lucianus), ona o lona mana'o e aua ne'i iloa o ia e nisi ae se'i tusi ana tusi e aunoa ma se faalavelave mai o nisi. A o le toatele ia o Porotesano talavou sa latou saili Kalavini ona o lo latou fia faalogologo i ana a'oa'oga.

Na oo ina lauiloa le lomiga muamua o le tusi na ia faia, ofo foi tagata i le lotu tele o Kalavini ma lona faitioina sa'o o le tupu o Faranisisi. Na fiafia foi tagata ona o Kalavini na ia tusia. O lea tusi na avea ai Kalavini o se tasi o tagata Toe Fuata'i aupito sili ona faalogo iai tagata.

O le Polokalame a le Atua mo Kalavini

Na sosoo le lomiga o lea tusi ma le malaga ese atu o Kalavini ma lana uo o Lui Tiletai mai Pasele mo le aai o Ferrara i Atumauga o Italia. E le o mautinoa pe aisea na tuua ai e Kalavini Pasele, ae talitonu nisi ona ua maua sa na galuega iina i se tamaitai nopele, na ia faafaigaluegaina o ia o se failautusi. O lea galuega na maua ai tupe e ola ai, faaoga ai lona poto faaetulafono, ma saoloto ai foi e fai ana suesuega ma tusi ana tusi.

Ae le'i umi ona taunuu Kalavini i Ferrara ae amata tula'i mai ni faalavelave. Muamua, e ui lava o le tamaitai nopele o Rene o loo ia tausia nisi o tagata sulufa'i Porotesano, ae le mafai ona suia ai le mea moni, o ia o le tuafafine faaetulafono o le tupu o Faranisisi I. O se mea lea na le te'a ai le mafaufau o Faranisisi mai Ferrara. E le'i umi ona taunuu iai Kalavini

IOANE KALAVINI

O LE APOSETOLO A'OA'O ATU

ae pu'eina se faifeau Farani, ma faaaauau ai le sailiga o nisi foi tagata Farani. Ona faavavevave ai foi lea ona tuua e Kalavini ma Tileti ia le aai o Ferara.

O le taimi lea na o eseese ai Kalavini ma Tileti. Ua faasalalau mai se faatonuga a le tupu o Faranisisi I, e ono masina o le a saoloto ai soo se tagata tetee e tuua le aai e aunoa ma le pu'eina ma molia. Ona toe fo'i ai lea o Kalavini i Paris. A o iai iina, na malie ai o ia e faatauina atu e lona uso laitiiti lo latou fanua i Noioni. Ona o lo latou le saogalemu i Paris, ina ua mae'a ona faatauina atu lo latou fanua, ona toe savalia ai foi lea o le ala e Kalavini ma lona uso, faapea ma lo la tuafafine o Marie.

O le fuafuaga na fai, latou te malaga i Salasipeka (Strasbourg) i Suiselani, e nonofo ai loa ma maua ai so latou filemu ma le saolotoga. Na manatu foi Kalavini o le a faaaauau ai i lea aai ana tusitusiga e fesoasoani ai i le Toe Fuata'iga.

Ae na toe suia lea fuafuaga ona ua tula'i mai se va tau o Faranisisi I ma le Emeperoa o Salesa V, o le amataga o le la taua lona tolu, ua punitia ai le ala i Salasipeka. O le mea lea na faamalosa ai Kalavini ma lona uso, ma lo la tuafafine e aga'i i Sineva, ma malolo ai mo se po se tasi.

A o mea na tutupu i lea po e tasi na suia atoa ai le faagasolosologa o le olaga o Kalavini.

O le Ulu Ma'a'a Laulu 'Ena'ena

O le tausaga lea e 1536, i le faaiuga o le masina o Aokuso. O si tama'i fale sa iai Kalavini i le ogatotonu o le aai o Sineva. Na suia foi lona igoa a o malaga i totonu o lea aai, lea ua iai foi ma lana uo o Tileti. Na oo ina iloa e

Tileti ua i Sineva foi Kalavini. Ona ia ta'uina lea i se failauga faievagelia lafolafola malosi lauulu 'ena'ena e igoa ia Farera.

O Farera e mai se aiga tamalii o le atunuu, ma sa a'oga i lalo o Lefeva. O le mea moni o Farera le tagata a'oga aupito sili ona fefaataua'i ona manatu ma isi. O le upu faavalo'aga a Lefeva ia Farera, "O le a faafouina e le Atua le lalolagi, ma o le a e ola se'ia e vaai iai."

O Farera e le o se faia'oga, e itiiti foi sona poto faa-tagata suesue. Peitai o ia o se failauga faaevagelia 'upu'upu mamafa ma le malolosi, na ia tala'iina le Tala Lelei o le Toe Fuata'iga i soo se mea e maua ai sona avanoa. O le maama'ai o ana lauga na mafua ai ona sola ma Farani i le tausaga e 1523. Na ia tusia ni tama'i tusi se tolu, ma ia liua se a'oa'o o le Tusi Paia na a'oga i Paris, e igoa ia Piea Vireti, o se tasi na auai ma le atoatoa i le Toe Fuata'iga, ma o se uo mamae a Kalavini. O galuega a Farera na liua ai le aai mau'oa o Peni (Bern) i le faa-Porotesano. O le faamoemoe o Farera ia faaaauau lea liliuga o tagata i isi foi aai i le faa-Porotesano. Sa lamatia foi le ola o Farera ona o le malolosi o ana lauga, peitai sa sao mai ai o ia.

Na taunuu Farera i Sineva i le tausaga e 1531 ma galue loa mo le liliuina o le aai i le faa-Porotesano. Ua sua mai le tai o fouvalega faapolokiki ma faalelotu. Ua faafia ona tuli ese Farera ma Sineva ona o ana lauga malolosi, ae le uma ai lona u'una'i o isi latou te faaaauuina le galuega. O Vireti le isi o i latou na u'una'i.

O le tausaga la e 1533, ina ua manuia taumafaiga a Vireti, na toe ulufale atu ai Farera i le aai o Sineva, ma taumafai e faamaopopo le 'au faatuatua ina

ia mafai ona faatuina se a'oga ma se aulotu. Na manuia ana taumafaiga i le liliuina lea o tagata e fai ma soo, ma tapua'i, ma le itu tau a'oa'oga, peitai e le o ia o se tagata e masani ma mea tau a'oa'oga ma pulega. E leai sona poto ma se tomai i le itu tau pulega. Na ia ta'utino lava foi lona le agavaa i ia itu.

Ona o galuega a Farera na liua ai le aai tele o Sineva e avea ma aai o le Toe Fuata'iga i tausaga e lua mulimuli ane. O le a galulue soosoo tau'au le lotu ma le malo e faamautuina talitonuga faa-Porotesano. A tetee se tasi i a'oa'oga faa-Porotesano o le a tuliese loa o ia ma le aai.

Ua manaia le mea ua oo iai, ae faaletonu lava Farera. O ai a na ta'ita'i le toefuata'iga? O ai e iai sona agavaa e a'oa'o tagata fou o le lotu ma faamaopopo le Ekalesia ua tuputupu a'e? A o fenumia'i le mafaufau o Farera i ia mau fesili, ae ia faalogo o loo iai Kalavini i le aai mo se po se tasi. Ua matua fiafia Farera i lea avanoa.

O le Po Lauiloa e Tasi

Ina ua talanoa mulimuli ane Kalavini e uiga i lea po e tasi i Sineva, na ia faapea ai, "Ua tulei a'u e le Atua i totonu o le taaloga." Ou te fiafia i lea faaupuga aua e aliali mai ai le pule aoao a le Atua i le olaga o se tagata o lona agaga ua matua tuuina atu atoatoa mo le Atua. E iai a tatou fuafua, a o le Atua e pule i le faatinoina.

O loo malolo ma le fiafia Kalavini i lea po o le tau mafanafana i Sineva, ae te'i ua tatope atu le tu'itu'i a se tagata i le faitoto'a. E tatala atu, o se tasi o faamatua o le Toe Fuata'iga, o

faaaauau itulau e soosoo ai

Toe Saili le Vaai

E ono tausaga talu ai, ae ou tauaso, ona o se vairusi na aafia ai o'u mata. Ua ou le maua nei se tasi o meaalofa taua mo a'u, o la'u vaai. Ua le faatagaina a'u ona ou tu i se mea o susulu malosi iai le la. E oo foi i totonu o le fale o loo malamalama malosi ai moli eletise ua faigata ona ou nofo ai. E ati le malamalama i o'u laumata ma tiga ai o'u mata. Ou te le'i sauniuni mo lenei lalolagi pogisa ua ou oo iai, a o lenei faato'a 17 o'u tausaga.

E tasi lava le mea na ou moomoo iai i lenei taumafanafana atoa, o lo'u fia vaai lea i tagata - pe o a ituaiga ofu o 'o'ofu ai tupulaga

talavou; poo ai ua vali 'ena'ena pe lanumoana lona laulu. A ou talanoa i tagata, ua ou le iloa foliga o o latou gutu ma mata, pe o fiafia mo'i pe leai, pe 'a'amu foi. Ua le mafai ona ou pulato'a atu i se tagata ma ou iloa ai i ona mata, ni ona lagona. Ua le mafai foi ona ou talanoa i se isi e faaoga ai na o o'u mata'emo'emo solo ma mafitifiti ai o'u laumata. O le mea moni, ua le atoatoa lo'u tagata e aunoa ma la'u vaai.

Ua fai nei o'u matua ma fesoasoani autu ia te au. Na ave au i aso uma i se saienitisi faapitoa mo tauaso ma le faamoemoe e

maua ai se fesoasoani. Ae leai se isi o toe manatu e toe atoatoa la'u vaai; afai foi e toe oo ina atoatoa, o le a se umi e faatali ai? Ua fetuuna'i nei le olaga o o'u matua faatatau ina ia fetau ma mana'oga o le tauaso o lo'u tagata. Ua faati'eti'e solo a'u i le la taavale e faafiafia ai au. A malamalama tele, ua fai o'u mata tioata pogisa e taofiofi ai le tiga o o'u mata.

I fale'aiga, e tusi e o'u matua a'u meaa e aumai, ma tuu i o'u luma, ma ta'u mai ia te au poo fea o iai lea ipu ma lea ipu. E mata'utia si o'u tina, e tusi ia te au i mea e pei o le seluina o lo'u ulu, ma le faiga o o'u ofu. O lea foi na ou faamoemoe ai pea i lo'u tina e fai

IOANE KALAVINI

O LE APOSETOLO A'OA'O ATU

Farera! Ua ulu atu i totonu ma augani ia Kalavini ina ia nofo e fesoasoani i le faatuina o le galuega i Sineva.

Ua iloa lelei atu e Kalavini le mumu saesae o le naunau o lenei tagata i le galuega. Peitai e malosi lava le faamoemoe o Kalavini e nofo i le potu tusi ma su'esu'e Afioga a le Atua, o lea na ia teena ai le tagi atu o Farera e nofo i Sineva. Na ia ta'u atu ia Farera lona fia saoloto e su'esu'e ma tusitusi i le mea e mana'o iai. E le mana'o o ia i le olaga o le galuega mo tagata lautele. Ma le isi mea, e na o le tasi le po lea e nofo ai.

Ua mae'a ona fuafua e Kalavini lona ola, ma e le ogatasi lea ma le ofo ua tuuina atu e Farera.

O le talitonuga o Farera o le la feiloaiga ma Kalavini o se mea mai le Atua, ma talitonu foi ua

tuulafoa'i e Kalavini le fe'au a le Alii, na tusi sa'o atu ai le lima o Farera ia Kalavini ma 'ote: "A e musu e tuuina atu lou ola faatasi ma matou mo le galuega - o le a faamalaia oe e le Atua. A o loo faalogologo mai se isi vaega o le fale le uo a Kalavini o Tileti

Ua vaai toto'a atu Kalavini ia Farera ma mafaufau ifo, o le tamaloa lauulu 'ena'ena, e tautala malosi e pei o se perofeta o le Feagaiga Tuai.

Ua luluina atoatoa Kalavini i upu mamafa a Farera. Mulimuli ane ona faapea lea o ia, na fefe i upu a Farera, ma ia talitonu ai, e pei ua silasila ifo le Atua ia te ia mai le lagi ma tusi lona aao ia te ia.

Na tutumau Farera i le mea na talosaga ai ia Kalavini, e le'i toe faafo'iina ana upu. E le malamalama o ia pe aisea i se

tagata faapea a o loo tuu mai le galuega e fia fai e matua mana'omia ai lona tomai. Ua iai Sineva i le tulaga nofo sauniuni mo le Toe Fuata'iga, ma o Kalavini le tagata na te mafai ona ta'ita'i.

Ua oo ifo le lagona o Kalavini, ua i ona luga le 'a'ao o le Atua, ma ua liu suavai ai ona mana'o ma ona popolega ma suia i le malosi e tataua ona usitai. Ua tuu nei fuafuaga ua mae'a ona ia faataatia mo ia. Ua tagata fou nei Kalavini, i le tagata ua "pu'eina e le Atua"

Ina ua te'a le po e tasi na moe ai i le aai, ona aga atu lea o ia i Pasele e aumai uma ana mea o loo iai, ma tuua lona aiga. O le aso muamua o Setema, ua i Sineva Kalavini, ua sauni e amata le galuega.

Toe Saili le Vaai

ana faiga faatina e faaaulelei ai a'u, aua e le mafai ona ou iloa i ou mata. Ua oo i lo'u matua e tatau ai ona ou tu toatasi i soo se mea, ae o lea ua ou faalagolago i o'u matua i le tele o mea e fai.

E ui lava o le tele o mea ua le mafai ona ou faia, ae sa iai sa'u uo sa fesoasoani mai ia te au. A o le'i po la'u vaai, sa ma uo ma ma feoa'i ma Taini, e ui lava e le o se faiga uo na maumaututu lelei i ia aso a o lelei la'u vaai. O se isi aso na ave ai a'u e Taini i le taaloga peisipolo. ma le papakiu, ma faafeiloa'i a'u i le toatele o ana uo. O lo'u matua fiafia ia i lea aso. E le'i popole Taini i lo'u le mafai ona ou vaai i ana uo. Ae na ia 'u'u lo'u lima ma ta'ita'i solo au. E ui lava ou te le'i mafai ona ou iloa atu mea'ai sa fai, ae na ou lagona lelei le sasala manogi manaia o mea'ai.

O le tau faai'ui'uga o le tau

mafanafana na amata ai ona ataata mai mea i la'u vaai. E ui lava o loo nenefu pea la'u vaai, ae na ou manatu o le taimi lea e tatau ona sami ai sia laasaga o le toe fo'i mai o la'u vaai. Ae popole lava o'u matua, a o Taini, si a'u uo, e le alu ese ma o'u tafatafa.

I le taimi o lo'u matua ua ou iai, ua tatau ai ona ou tafitifiti ma fiafia, ae ua ou popole i le vaai mai ma le manatu o isi tagata ia te au, o se tama tauaso. A o le vai taimi foi lea na oo ifo ai ia te au se manatu, e le tatau ona ou faamoemoe i o'u foliga o loo vaavaai mai iai isi tagata, ae tatau ona ou manatu loloto ifo ia te au lava, ma o'u lava talitonuga i le mea e sili mo a'u, tusa lava pe o le a le manatu o tagata.

Ua ou talitonu nei, e le o lo'u tauaso e taua, ae taua pe o le a le ituaiga tagata o loo o'u ola ai. Pe

se tagata lelei pe leai. E le o mafai e lo'u tauaso ona aveesea lo'u faalogo atu i leo malie ma le fiafia ma le alofa o tagata o lo'u aiga, o a'u uo, ma soo se tagata e talanoa mai ia te au. E le o aveesea e lo'u tauaso le manogi manaia o meaai o latou kukaina. E le o mafai foi e lo'u tauaso ona aveesea lo'u faalogo atu pea i le lima o la'u uo o Toni, o ia 'u'uina lo'u lima, ma 'o'omi.

E tele lava se suiga ina ua te'a tausaga e ono, o loo mana'omia pea le tului o le vailaau i o'u mata e taofi ai le vairusi ne'i toe aafia ai ou mata. Ua amata faaaoga nei tioata faapipii i totonu o o'u mata.

I nei tausaga e tele sa po ai la'u vaai, e le'i tuua lava a'u e la'u uo o Toni, ma faafeiloa'i foi au i isi tama ma teine ma fai iai o a'u o lana uo teine, se'ia oo lava ina ma nonofo ma ia faafeiloa'i a'u i tagata, o lona to'alua, o Tailini.

tusia e Tailini

O le Uiga Moni o le Tatalo

O se mea uiga ese le manatu mama o le toatele o tagata i le mataupu i le tatalo. O nisi tagata, ua pei o se mea na ona faaupu ma tauloto ae le manatu mamafa iai. O isi, na o se mea e tua iai pe a tula'i mai ni faafitauli ogaoga.

E ui lava tatou te le masalomia le tali mai o le Atua ia tatou tatalo i taimi ma ituaso o o tatou puapuaga, e tatau lava ona tuu ni taimi atofaina lelei mo a tatou talosaga. 'A 'e faamuamua ina le tatalo i lou olaga, o le a le pine ona maua mai ai i lou lava ola le loto faamalieina ma le faatumuina. O le tatalo e le faapea na o lou talanoa

i le Atua. E tatau foi ona faaavanoa ni ou taimi e te nofo filemu ai, ma e faatalitali i le Atua. E tatau ona e faalogo lelei i le musumusu mai o le Agaga o le Atua ia te oe, ma na ta'ita'iina oe. O le tatalo o se mea fai to'alua - o oe ma le Atua. O lau talanoaga ma le Atua; ma lou talitonu, faalogo ma usitai i le mea o fetalai mai ai pe tali mai ai le Atua.

Matua tuulafoa'i atoa atu oe i le Atua. Fola uma ou faanaunauta'iga, ma tagata o loo e talotalo iai, i luma o le Atua, ma tatalo ina ia faia lona finagalo, ae le o lou loto. Pei lava ona maua e

le Keriso soifua ma usitai i le finagalo o le Atua, ia faapea foi ona e faia. E le o lou loto, a o lona finagalo. Faamasani i le tatalo, ona le fesoua'iina lea o lou tagata i faafitauli e tula'i mai i lou ola, ae te to'a i le ta'ita'iga a le Agaga o le Atua tali mai.

Persistence

Nothing in this world can take the place of persistence.

Talent will not; nothing is more common than unsuccessful men with talent. Genius will not, unrewarded genius is almost a proverb. Education will not; the world is full of educated failures.

Persistence and determination alone are omnipotent.

A Page for Youth

ITULAU MO TUPULAGA TALAVOU

Agelu!

mai le itulau muamua

o fai i le lalalaau i tafatafa o lo matou fale. Ona lele ifo lea ua talatalafulu i le vaivai na maua mai i timuga o le po anapo. Na ou mafaufau, ana o a'u o se manulele, o fea ou te lele aga'i iai? O a ni a'u mea e fai i le aso atoa? Ae na ou iloa lava e a'u le tali e le mafai ona ou lele. O lea na o lo'u nofonofo ma matamata i le lalolagi o fegasoloa'i, a o lea e leai sa'u mea o fai. Na ou toe mafaufau,, e tataua ona fai la'u homework, peitai ua ou malie lava e mata'i tifiga a le manulele lea e fai i luga o le lalalaau ma le vaivai. Oo ina lele le manu ona ou kiina ai lea o la'u televise ma ou matamata i le ata o pafalo.

Toetiiti tuua le a'oga, ae ou te le o iai, o lea ou te ma'i. Manaia ia o le aso, ae o lea ou te ma'i ai i le aso manaia. Tiga lo'u ulu, matua tiga lava! Ua susulu malosi mai le la, ua atili ai ona ou ita i lo'u ma'i i le aso matua manaia.

Ua amata nei ona gogolo mai ma lo'u manava, ona ou alu ai lea ua ou taoto i lo'u moega, ma faasolo o'u mafaufauga. Ae oso mai le tiga o lo'u ulu ma tapunipuni faitotoa o lo'u mafaufau. Ua ou mafaufau, o le umi ia o le aso pe a leai sau mea e fai, a o le puupuu ia pe a iai se mea e te fiafia iai. Ua ou mafaufau i le fitu o itula ia e fai ai le a'oga, sau i le aiga toe fai homework i le isi fa itula, usu i le a'oga i le taeao fetau ma su'ega.

Ona amata ai lea ona ou miti, miti a o lea e pupula o'u mata ou te le o moe. Ae te'i ua oso mai le le agelu i lo'u mafaufau. *O a o latou foliga? E auro ni o latou*

apa'au? E iai ni o latou tuana'i? O i latou 'ea e na'o ni malamalama? Pe na o se savili, 'ea?

Ua le mafai ona taofi lo'u mafaufau i agelu. *E avea moni 'ea tagata ma agelu pe a feoti?* Fai mai a'u uo e leai, ae ou te manatu o lo'u grandpa o le agelu tausi lea a lo'u grandma. Ua ou tago atu nei i le pepa ma tusi ai le ata o le agelu lea ou te mafaufau iai.

Ua uma le ata o le agelu, e lanu auro lona lauulu, e auro foi ma ona apaau, e uumi ona apaau e oo atu lava ma papa'i i tagata lo latou uumi. E sinasina lona ofu, e 'ata'ata, e iai ma se pale pei o ni fetu e taamilomilo i luga o lona ulu.

Ua ou matamata i la'u ata na tusi

ma 'ou ata, ma pei ua te'a ai le tiga o lo'u ulu ma lo'u fulu. Ona ou moe ai lea.

Ou te ala a'e ae valaau mai le tagata, "O iai se isi i le fale?"

Na ou tali, "Hai Mama!"

"O a mai oe?"

"Feoloolo!"

Ua fai mai nei lo'u tina o le a alu e fai sa'u meaai, se supo. O le popoto ia o mea nei o tina e faafiafia oe. Pei latou te fofo'e ese atu ou ma'i ma faa'ofu ai latou. E faapena lava uiga o tina, e tali mai i ou mana'oga i taimi e te mana'omia ai. E matua faanoanoa lava tina pe a vaai atu o faama'ima'i mai sana tama, tusa lava pe na'o se tama'i fulu.

O lea ua ou manatu, ou te le tau saili pe faapefea foliga o le agelu. Ua ou iloa lava e au. O le agelu, o le tina. O lo'u Tina! O lana 'ata'ata e faatumuina ai le fale pe a oo ina pogisa. O lo'u tina o le agelu, e vaavaaia a'u ma tausi.

Iapesa o se Fuafanua

mai le itulau e 5

gata e faamalosia ai Iapesa a ia tautoaluaina ai o ia.

3. Leaga (ia e leoleo mai ia te au ai le leaga). O le upu e mafai ona sui le uiga pe a aveese vaueli e pei ona muai faaogaina e sikola Iutaia i le amataga o a latou tusitusiga. A leai ni vaueli ona faauiga lea *faia fanua vao lelei* ae le o le *leaga*. Mai lea sailiga e iai le avanoa e finauina ai le faaliliuina lea *'ia e leoleo mai ia te a'u ai le leaga* i le *ia e faia mo a'u ni fanua vao lelei* aua e fesootai ma le faalauteleina o fanua pei ona taua i luga.

I se isi la toe faitauina o lenei tatalo e faapea, "*E, fia manuia a'u ia te oe ma faauluolaina lo'u laueleele, ia ia te a'u lau pule/ malosi ma ia e faia mo a'u fanua*

vao lelei, ina nei tigaina a'u.

O le finauga lea a Iapesa o loo atagia ai lana fua i fanua/gafa o Sa Iuta, e tulaga ese mai le natura masani o gafa ma fanua aua e fua i piitaga ma faia, e pei ona to laulauina e le Nofoaiga Tupu muamua. O le natura masani foi lea na ala ai ona faaigoa e lona tina ia Iapesa ona o lona tiga (aua na fanua ma le tiga), ae valaau ai Iapesa i le Atua ina ia faalautele fanua, e ala i lana pule fai toatasi.

Iapesa ma le Mopili

E ui lava ina malosi le finauga o Iapesa o se Sa Iuta, aua o loo iai pine o le fanua Iapesa i totonu o eleele o Sa Iuta, e lagolago e lenei suesuega le manatu o Iapesa, o se *faaauau itulau e 12*

O le Suasusu mo le Mafaufau

O ni mafaufauga e uiga i le Alofa Faa-Kerisiano o loo tautala iai Peteru i lana tusi (1Peteru 2:1-3) -

“O lenei, ia tuueseina e outou le loto leaga uma lava, ma le faa’ole’ole uma, ma le taupelopelo, ma le matau’a, ma tautalatalaga leaga uma lava; faapei o tama meamea faato’a fanau mai, ia naunau outou i le suasusu faaleagaga e le suia, ina ia outou tutupu ai i le faaolataga, pe afai ua outou iloa e agalelei lava le Alii.”

E lima mea o loo ta’ua e Peteru a iai uma, ua maua le alofa faa-Kerisiano.

1. Sa’oloto mai le loto leaga. Soo se alofa lava i se mafutaga, o le a faaleagaina pe afai e maua se isi, poo nisi o le mafutaga, i le loto leaga i isi tagata, pe matau’a foi i isi tagata. Pe faaali foi ni ou uiga inoino ma mata fasiasia.

2. Saololto mai le faa’ole’ole, faasese, ma upu ese. Poo ni uiga faatogafiti e faaseseina ai.

3. Saoloto mai le taupelopelo. Poo le na ona faafoliga o se mea moni ae leai. Poo ni tala manaia e fai mai ae le moni, e pepelo ma tau faasese.

4. Saoloto mai le matau’a. Lou loto e leaga ona o le tulaga maualuga o iai se tagata, poo ni ‘oa o ia maua, poo lona lauiloa ma aloa’ia e tagata.

5. Saoloto mai tautalatalaga leaga uma lava. Poo le faaleaga o le isi tagata ma fai ni ona tala, o ni mea e leaga ai le isi tagata. Tau faaleaga o le tagata lelei.

O nei agasala uma ua ta’ua e Peteru, e te le lavelavea ai i tulafono a le malo. Leai. E le o ta’ua e Peteru le fasioti tagata, gaoi, mulilua. O mea o loo ta’ua e

Peteru, o uiga ia a iai i se tagata, e fai ma mea e motusia ai le mafutaga mafanafana a le auuso.

E matua toatele lava Kerisiano e latou te le faia soligatulafono ia e oo ina falepuipui ai - fasioti tagata, gaoi, mulilua ma isi. Ae latou te faaleagaina le mafutaga mafana a le ‘au Kerisiano ona o lo latou faitatala, ma o latou uiga matau’a ma taufaaleaga.

Ona sosoo ai lea ma le ta’ua e Peteru o uiga faale-Atua o le Kerisiano e faatupu ai le ola fou i le fanau fouina ia Keriso ina ua faaolaina. Ua ia i latou le fatu o le ola na faatupuina e le tala lelei o le faaolataga.

1. Ia tutupu a’e i le upu a le Atua. Pei ona naunau le tamameamea i le suasusu mai lona tina, ia faapea ona naunau i latou ma fia ‘a’ai i le upu a le Atua. Ia naunau e faalogo i le siufofoga o le Atua. Peteru 2:2: “...faapei o tamameamea faato’a fanau mai, ia naunau outou i le suasusu faaleagaga e le suia, ina ia outou tutupu ai i le faaleagaga.”

2. Ia latou saili i le tuputupu’a’e faaleagaga. O le suasusu o le upu moni, o le a latou tutupu a’e ai i le faaolataga. Ua faaolaina i latou ona ua avea i latou ma fanau a le Atua, ua ‘o’ofu i latou i le amiotonu a Iesu Keriso.

Peitai ia faaauau pea ona laveaiina i latou mai uiga tuai. Ua ta’ua e Peteru lea uiga, o le tuputupu a’e i le faaolataga. O lona uiga e mana’omia le tuputupu a’e pea lava pea o le Kerisiano, ma na matauina uiga fou o le faaolataga ia Keriso.

Sa faamanatu pea lava pea e Peteru i Kerisiano ina ia latou manatua poo ai i latou, ma pe o a mea ua oo ia i latou. Amanatunatu loloto pea i mea ua uma ona fai e le Atua mo latou, o le a latou maua mea e tele e faalototeleina ai i latou a o latou aga atu i luma faatasi ma le Atua. Ua latou mautinoa, o le Atua e alofa. Na maluu Iesu mo latou. Ua auina mai mo latou le Agaga Paia. Ua faamagaloina e le Atua le tele o mea sese na latou fai. Ua latou mautinoa le agalelei o le Atua. Na agalelei le Atua ia i latou i tausaga ua mavae, e toe agalelei foi o ia ia i latou i tausaga o lumana’i.

O le Tauvalaau a le Alofa Taumulimuli

mai le itulau muamua

O le tala lenei na faamatalaina e Charles Dickens le tusitala (author) ta’uta’ua a Egelani.

O le faauooga a le tama ma le tina o Tomasi Peki (Thomas Becket), o se tasi sa tautala ma lauga malosi e faapea o le pule a faife’au o le Ekalesia e sili lea i lo le pule a le tupu. O lea talitonuga o Tomasi na oo ina fasioti ai o ia e fitafita a le tupu o Enele II i totonu o le malumalu i Canterbury, lea sa akiepipoko ai.

O Kilipati le tama o Tomasi, o se faioloa i le aai o Lonetona, na alu sa na asiasiga i le Nuua Pa’ia ma oo ina ave faapagotaina ai o ia e se tamalii iloga o ia elelee. O

lea tamalii e iai sona afafine matua lalelei lava. Na oo ina momoo le teine ia Kilipati, ma fai iai e fia faaipoipo ia ia. Ma a la nonofo, o le a liliu mai lana tapuaiga ma avea o ia ma Kerisiano ona la sosola ai lea i se atunuu Kerisiano e nonofo ai. Na matua fiafia Kilipati i le alofa o le teine ia ia.

Ina ua maua le avanoa e sola ai mai le mea sa faafale puipui ai o ia, ona sosola ai lea ma lana auauna o Risati ma taunuu i Egelani. Ma galo ai le teine o loo i le Nuua Pa’ia.

Ae le’i galo i le teine ia Kilipati. Ua teteu nei o ia ina ia le iloa ai o ia e tagata, ma sola ese ai mai le fale o lona tama, ma aga’i atu i le *faaauau itulau e 12*

Iapesa o se Fuafanua

mai le itulau 10

tagata ese. E le gata o mafuaaga o ta'ua i luga, ae o loo iai foi faamaumauga e iloa ai o tagata Sa Keni, e o mai uma i le laina o tagata Rakapa (1 N.T.2:55) lea e tupuga mai ai Iapesa, o tagata ese (Gentiles). I ia la faamaumauga o loo auiliili mai ai, tagata Sa Keni o tagata na malaga mai ma nonofo i aai o Sa Iuta.

Mai nei la faamaumauga, ua manatu ai le pepa, Iapesa o le tagata ese, poo se tagata malaga (nomad) na malaga mai e tau saili se nofoaga mo ona tagata.

Peitai e ui ina tagata ese Iapesa, a ua iloa i le oso faalava o lana tatalo, o se tagata (ituaiga) ua faatuatua ma talitonu atu i le Atua o Isaraelu. Ua le finau atu i tagata Sa Iuta e ona eleele nei, a ua finau atu i le Atua e ou mea uma i lana pule alofa ma lana pule faale-Atua, ina ia faalautele, faauluola mai e le Atua ona eleele, ina ia lavea atu ai ma tagata ese e pei o ia i fanua tau Sa Iuta (Isaraelu). Afai la o Iapesa o se tagata ese/malaga, o le sootaga lea o le tala ma le mataupu tau mopili.

O le mopili ua avea ma natura o le ola faale-tagata soifua. Atonu e eseese foliga o le mopili mai lea taimi i lea taimi o le olaga, a ua avea lava o se natura i le tagata. Faataitaiga, i aso anamua, na savavali (sopo/foot mobile) tagata Samoa mai lea nofoaga i lea nofoaga ina ia fesoota'i, o paopao i le sami na fesoota'i ai le isi motu i le isi motu (islanders as seafaring people), seia oo mai i nei aso ua televave le numera o tagata feoa'i ona ua faaaogaina taavale afi, vaa afi vaa tetele ma vaalele. E iai itu vaivai (disadvantage) ma itu lelei (advantage) o nei feoa'iga e pei ona silafia. E eseese foi mafuaaga o femalagaa'iga ma feoa'iga. A o le mea mautinoa, e feoa'i tagata, ae le feoa'i fanua ma

eleele. O nisi o mafuaaga iloga o le mopili ona: o aoaoga (education), galuega (jobs/careers) sailiili manuia ma isi.

I tua atu o nei mafuaaga, e iai le talitonuga taatele, o le malaga mai se atunuu laititi (eg Samoa) i se atunuu tele (Niu Sila) o se laa lea i luma, poo se laa sili atu o le soifuaga. E tuu faafeagai lea manatu pe a malaga mai se atunuu tele i se atunuu laititi, lea sa mafua ai le faoa o le pule o fanua ma eleele o atunuu tau atia'e e atunuu tetele o le lalolagi (colonisation). A mafaufau foi ia Isaraelu ma lona foi tala faasolopito, o ni tagata sa faapea foi ona feoa'i i le amataga (nomadic); na faatafea solo i pulega ese i le pule a le Atua. Peitai na tuvae loa i fanua (Kanana), amata loa ona vaevae le tagata ma lona faasinomaga. E nofo fua i eleele ese, a o le mafaufau lea o loo i Kanana le nuu folafolaina, o le tofi ma le faasinomaga.

I se vaaiga faamataupu silisili pe a faatusa Iapesa ma le soifuaga o le tagata Samoa, e mopili le Samoa ma ave ona eleele. E alu ma ave lona aiga ma le soifuaga na soifua ane ai, faapea le talitonuga i le

Atua, o lona siosiomaga. O se manatu vaivai, poo fea e fetaaloloa'i iai le Samoa, i mafuaaga eseese e pei ona ta'ua i luga, e lagona pea i le toto le sootaga lea ma le faasinomaga, aiga (kin group), ma le olaga i aso fai soo (communal lifestyle) faapea ma eleele. E iloa gofie lea manatu i Faamasinoga o Fanua ma Suafa, ma mafutaga faaleaiga i nei ona po, aemaise le tele o mataupu tau fanua ma eleele o loo tulai mai i lenei vaitau.

Upu Faaiu

E leai se atoatoa i lenei suesuega vaivai, ae atagia mai, e laugatasia le tagata Samoa ma Iapesa o tagata ese ma tagata malaga, e leai se sootaga i gafa ma faasinomaga ia Sa Iuta. E leai ni o tatou eleele. Peitai o le tatalo a Iapesa e mafai ona fai ma tatalo a tagata Samoa uma - e maua le sootaga i le Atua. O eleele na o tagata Samoa, o le tofi foi lena o tagata faatuatua - o le Atua. I lana pule ma lona finagalo alofa, ua ia foa'i mai ia lava, e fai ma o tatou eleele; e fai ma o tatou tofi; i le ua fai ma faavae o Samoa.

O le fua faa-Iapesa!

O le Tauvalaau a le Alofa Taumulimuli

mai le itulau e 11

taulaga e iai vaa o le vainuu.

A o faatasi ma Kilipati, na a'oa'o e Kilipati ia upu e lua o le gagana Peretania: o lona igoa o "Kilipati", ma "Lonetona". Ua alu nei le teine i le mea o iai vaa'oloo, ma tauvalaau ai: "Lonetona!". Na faasino ane e seila i le teine le vaa e folau i Lonetona, ona ia totogi ai lea o lona pasese i nisi o ana maa taua, ma oo ina taunuu i Lonetona.

O le la e nofonono Kilipati i lona ofisa i le isi aso ae ausulusulu atu lana auauna o Lisati: "Posi! Posi! Le teine fo'i lele! Le la e tauvalaau

i le mea le la e iai vaa: "Kilipati! Kilipati!" Na iloa atu e Kilipati le teine ma tamo'e atu iai. Na iloa mai e le teine Kilipati ma tamo'e mai iai, ma fusi e le isi le isi.

'Ae a tauvalaau faapea se teine i le atunuu foi lea ei o, tafefe i ni tala e fai i si teine ma faapea o le fia fai tane poo le faamasiasi aiga.

**It is more blessed to
give than to receive
Acts of the Apostle 20:35**

Mum!:

o se tala mo Tina

E saputu mai lava pea lava pea lo'u manatua o mea, pei o fugalaau e fiafia iai, lona fiafia i tifiga a le matou ta'ifau, o ana tala malie e masani ona fai i lo matou aiga, o ona foliga pe a talanoa i tausaga oi luma. Ona e le'i uma ni ana aoga, o lea na mana'o ai lava ia ou i'u lelei.

E tasi lona tausaga i le kolisi ae nofo e faaipoipo. E ui lava na fiafia e nonofo ma lo'u tama, ae

na ia misia le faaauauina o lana a'oga. Na mana'o ai lava ina ia mae'a lelei a'u a'oga.

Na o ia lava le tagata ou te talanoa iai i soo se mea, o lanu o o ma ofu, ma ofu ma te aulelei ai. E fiafia i aso malolo, aemaise lava le Kerisimasi.

E leai leai lava ma so'u manatu e oo mai i lenei taimi ua le iai i lo matou aiga, ma taalo ma le matou ta'ifau, ma fai a la tuliga i totonu o lo matou fale, ma ta'ei ai a matou ipu. E leai ma so'u manatu o le kanesa e faapea ona vave ona ma'i tigaina ai se tagata, ma maliu ai i se taimi puupuu, se tagata malosi ma le le ma'ima'ia. E leai ma so'u

manatu o le a vave ona oo mai se taimi o le a ma le toe faatasi ai ma Mum. Ua faafuase'i lava ona leai se tagata ma te talatalanoa i mea ou te fiafia iai.

Atua le a'oga ma ou taunuu mai i lo matou fale, ou te taunuu mai i se fale ua matua gaogao, ae tumu i ni ata faale-mafaufau o mea ou te manatua i aso a o ma'i tigaina.

O le mea aupito sili ona faigata ia te a'u, o lo'u mafaufau lea i tausaga e tele oi lumana'i, e aunoa ma lo'u tina. Mum! Mum!?

tusia e Stacy Cowley
faamatalaina e

Afemata T. Apelu Aiavao

O Amapasa a le Atua

O le fai Evagelia o Tana (W.D.Dunn) sa faasolo ni ana sauniga faa-evagelia i se fale tele (hall) i Motherwell i Sikotilani, tusa e sefulu maila mai Glasgow. A o faagasolo ana sauniga, ae maliu sana uo e igoa ia Misi Ka (Carr). Na valaauina o ia e auai atu i toe sauniga o le uo. A o le faalavelave, e tusa o le selau maila le mamao o le mea o maliu ai le uo. Na na su'esu'eina malaga a le nofoaafi ma na iloa ai, e mafai ona malaga mai i Motherwell i se nofoaafi tuusa'o i le taeao o le aso o le falelauasiga, toe pu'e ai le isi nofoaafi e fo'i ai ma taunuu i Motherwell mo lana sauniga faa-evagelia. Ona ia faia ai lea o le malaga. Peitai e taunuu atu i le mea e pu'e ai le nofoaafi e sui iai lana malaga, ua alu le nofoaafi.

Ona fesili lea i le tagata e pulea le malaga tuusa'o a le nofoaafi pe mafai ona tu le nofoaafi mo se minute se tasi ae oso e alu ai ina ia taunuu ai i le mea e lauga ai ao le'i amataina le sauniga. Fai mai le pule e le mafai. Ona faasaga a'e ai lea o ia i le lagi ma tatalo. Na liliu le failauga o le a savali ese ae toe fai mai le pule i malaga a le

nofoaafi, "Ae afai o oe o se Faipule o le Palemene, e ia te a'u le pule e taofi ai le nofoaafi mo se faipule." Fai mai Tana, "Leai, e le o a'u o se faipule, ae iai lo'u tofiga e maualuga atu i lo le faipule. O a'u o le amapasa."

"Amapasa? Ua lelei. O le a ou taofia le nofoaafi mo oe."

Ona savali ese atu lea o Tana e faatali le taunuu mai o le nofoaafi tuusa'o. Peitai na toe mafaufau ifo, sa tatau ona ia ta'u sa'o i le pule o malaga a le nofoaafi le ituaiga amapasa e iai ia. Ona toe liliu lea ma alu atu i le pule o malaga ma fai iai, "Na ou fai atu ia oe o a'u o le amapasa, ma o le mea sa'o lava lenei. Ae peitai e le o a'u o se amapasa o se malo o le lalolagi. O a'u o le amapasa o le Tupu o tupu. Ma o loo o'u tauaveina se feau mai le Tupu mo tagata e sili i le to'a afe o loo faatali mai i Motherwell e faalogologo iai.. O lea la ua ou ta'u sa'o atu ia oe lo'u amapasa. E tu la le

nofoaafi pe leai?"

"Ioe, o le a vili i le ave nofoaafi e taofi le nofoaafi iinei ae se'i e alu ai."

E alu atu Tana i le vaega o le nofoaafi e iai lona nofoa, na o se ulugalii o nonofo mai ai. Fai ane le tamaloa i lona toalua, "Ia, o le tu mulimuli lea a le nofoaafi ona oo ai lea i le mea ta te o iai.

Na tete'i le ulugalii i le fesili a Tana, "E moni? Leai, e tu le nofoaafi i Motherwell." Fai mai le tamaloa, "Ua ou malaga soo i le nofoaafi lenei, e le tu lava i Motherwell. O le a le mea o le a tu ai i Motherwell i le aso?"

Ae tali le faifeau o Tana, "E tu ae se'i alu i lalo le amapasa lea o loo malaga ai."

Ina ua tu le nofoaafi, na tutu atu i luga le ulugalii e matamata poo ai le amapasa lea o loo latou malaga faatasi. Ae leai lava nisi o o ese ma le nofoaagi, na o le tagata lea sa nofo i o la tafatafa ma latou talanoa. O Tana, o loo savali ese atu ma si ana tama'i 'ato ta'ita'i.

O le Tupu o tupu na te pulea nofoaafi ma na vaaia ana amapasa.

Appearance

Beauty is mind deep. You are as pretty, or as ugly, as you think you are. Visualize yourself as a pleasant, friendly, cheerful, laughing, sparkling person and your imagination will make you into that kind of person.

O le Mafuaaga o le Pese:

All Hail the Power

“Lo matou Alii e, ma lo matou Atua, e tataua lava oe ina ia tuuina atu ia te oe le viiga, ma le faaneeneega, ma le mana; aua na e faia mea uma lava, ona o lou finagalo foi e iai i latou ma ua faia.” - Faaaliga 4:11

Ua ta'ua soo lenei pese o le “Vii o le Malo o Kerisiano”. Faato'a lomua lenei pese ia Novema 1779, i le Mekasini o le Tala Lelei, o lona faatonu o Augustus Toplady, o le na ia tusia le pese: “Rock of Ages”. Toetoe lava o gagana uma a le lalolagi ua oo atu iai le Ekalesia Kerisiano, ua faaliliuina iai lenei pese, ma o fea lava e usuina ai, e papa'i atu lava ona lagona i mana'oga faaleagaga o tagata. Fai mai se tasi tusitala e uiga i lenei viiga: “A iai pea lava Kerisiano i le lalolagi, o le a tumau pea le usuina o lenei pese, ma a uma atu le lalolagi, o le a peseina foi i le lagi.”

O Eteuati Peroneti o le na tusia le pese, na fanau i Sundridge i Kent, Egelani, i le tausaga e 1726. E tupuga mai o ia i se aiga Porotesano Farani lauiloa i le Toe Fuata'iga na sosola muamua i Suiselani ma oo ai i Egelani ona o sauaga sa faia i tagata Porotesano i Farani.

O le tama o Eteuati, o se faifeau i le lotu Egelani, sa na matua lagolagoa talitonuga o Kerisiano sa ta'ita'ia e le 'au Uesile ma George Whitefield. Na avea foi Eteuati ma minisita i le Lotu Egelani, ae sa faitio lava i faiga o tapuaiga a le Ekalesia Egelani. Na ia tusia e faapea: “Na ou fanau mai le Lotu Egelani ma e le taumate ou te oti ai foi, ae ou te matua inoino ia latou mea e fai.” Ae na oo ina tuua e ia le Ekalesia Egelani ae faatasi atu i talaiga a le 'au

Uesile i le vai taimi o le 1740 e oo i le 1750. O le vai taimi lea na matua mamafa ai sauaga i le 'au Uesile ma e na mulimuli ia i latou, o sauaga na faia e tagata e tetee ia latou tala'iga.

O se isi faamatalaga uiga ese e faatatau i le va felagolagoma'i o le 'au Uesile ma Peroneti e faapea, na tula'i Uesile ma folafola i e na iai i le tapuaiga, o le a lauga Eteuati Peroneti i le isi sauniga o le a sosoo ai. Ona e sefuluvalu tausaga e laitiiti ai Peroneti ia Uesile, o lea sa faaali ai pea lona musu e lauga a o iai le faifeau iloga o Uesile. Na musu Peroneti e aliali se la fe'ese'esea'iga ma Uesile, o lea, na ona savali atu ai lava, tu i le pulelaa ma fai atu, “E ui i lea, o le a ou laugaina le lauga aupito ta'uta'ua ua laugaina e se isi i le lalolagi nei.” Ona ia faitauina ai

lea o le Lauga i Luga o le Mauga, ona nofo ai lea i lalo e aunoa ma se isi upu.

E tele tala e uiga i le faaaogaina o lenei viiga. O se tasi o tala na faamatalaina e E.P. Scott, o se uluai misionare i Initia. O se tasi aso na si'osi'oina ai o ia e ni tagata fasioti tagata na aga'i mai ia te ia ma o latou tao. Na oso vave mai i lona mafaufau lana vaiolini oi lana 'ato, ona tago ifo lea iai, aumai ma amata ona ta. Na te'i i le vaai atu ua tuu i lalo tao o tamaloloa mata sau, ona ia molimau ai lea i ia tagata e uiga i le alofa o le Atua ma lana faaolataga. Na oo ina nofo ai Scott i le nuu o ia tagata ma galue ai se'ia oo i lona oti. A o le pese na ia taina i lana vaiolini, “All Hail the Power”, na avea ma mea na faaolaina ai nei tagata faapaupau o Initia.

All Hail the Power

All hail the pow'r of Jesus' name!
Let angels prostrate fall;
Bring forth the royal diadem,
And crown Him Lord of all;
Bring forth the royal diadem,
And crown Him Lord of all.

Ye chosen seed of Israel's race,
Ye ransomed from the fall,
Hail Him who saves you by His grace,
And crown Him Lord of all;
Hail Him who saves you by His grace,
And crown Him Lord of all.

Let ev'ry kindred, ev'ry tribe,
On this terrestrial ball
To Him all majesty ascribe,
And crown Him Lord of all;
To Him all majesty ascribe,
And crown Him Lord of all.

O that with yonder sacred throng
We at His feet may fall!
We'll join the everlasting song,
And crown Him Lord of all;
We'll join the everlasting song,
And crown Him Lord of all.

Hold On To Your Dreams

All big men are dreamers. They see things in the soft haze of a spring day or in the red fire of a long winter's evening. Some of us let great dreams die, but others nourish and protect them, nurse them through bad days till they bring them to the sunshine and light which comes always to those who sincerely hope that their dreams will come true.

Woodrow Wilson, 1856 - 1924 President of the United States of America

O E UA MALILIU

Tuiavalei Epati So'o'ula Lei'ataua 17 Mati 1928 - 6 Oketopa 2014

O le tina matua o le Ekalesia EFKS i Lepale, Fasitoota. Ua 86 tausaga o lona soifua. Na soifua mai Tuiavalei i le aso 17 Mati 1928, mai ona matua o Seumanu Epati o Salelologa ma Ofa Amosa Fretton o Fasitoo-uta ma Falealili. Ae na faamanavaina e le Atua ana feau i le aso 6 Oketopa 2014.

Sa a'oa'o'ina o ia i le a'oga tulagalua a Fasitoo-uta, ma faasolo atu ai i le Kolisi o Avoka. Sa galue muamua o ia o se tausima'i. E tele foi ni tausaga sa avea ai o ia ma faatina o le nofo

tumau o le Kolisi o Samoa e ala i lana taleni o le kuka.

E toatele i latou ua avea nei ma minisita, o loia, o faifeau, o leoleo, o faiaoga ma isi galuega lelei uma, sa faafailele mai i lima alofa o lenei tina, a o nofo tumau ai i le Kolisi o Samoa. Na malolo litaea mai le Kolisi o Samoa, ae na toe faafaigaluega e le Susuga ia Sinave Isara, o se matron i le Kolisi o Vaipouli i Savaii, a o avea Sinave ma pule.

Sa faaipoipo atu o ia ia Soula Leituala o Vaitoomuli i Palauli, ma e toatolu le la fanau moni ma a la fanau fai e toatolu foi. E maliu nei le tina, ua fa ana augatupulaga, a ua lata i le selau i latou ua tupuga mai ia te ia.

O se tina finau ma tauivi pe a fua i le

leva ona maliu le tama, ae sa tauivi faatasi mai ai lava i le tausiga ma le faaa'o'ogaina o le fanau. O se tina sa fai ma lamepa e susulu i totonu o lona aiga, le nuu aemaise

le Ekalesia i le ola mafuta i le Atua, ma le ola osiosi aiga. E olaola pea i loto o le fanau nisi o ana a'oa'oga i le soifua faaleagaga. A oo ina faatofa i le fanau o le a o i le a'oga ona faapea lea, 'O ma Iesu.' E tali mai foi le fanau, 'Nonofo foi oulua ma Iesu'. O ni upu e pei e faatauvaavaa i le faalogo, a o loo affii mai ai se feau taua o loo ia mana'o e faasoa atu i le fanau. O le Atua e iai i mea uma, na te silafia foi mea uma. Poo fea e aga'i iai, o loo iai le Atua e puipui ma leoleo i tatou.

faaauau itulau e 16

O le Pule Sa'o ma le Faasalaga

E tele senituri ua mavae sa ta'uta'ua ai ma logologoa tala o se ta'ita'i o se isi atunuu. I ia vai taimi sa fua ai le malosi o se atunuu i le malosi o sona ta'ita'i o loo iai.

Peitai o le ta'ita'i o le atunuu lea e faamatalaina, sa lauiloa foi i lana tofa ma lona pota. Sa ia faia polokalame e fesoasoani ai i ona tagata ina ia nonofo filemu ai ma fealofani, ma latou tausia ma le faamaoni a latou tu ma aganuu lelei. Na lauiloa foi o ia i le le maluelue o lana tofa pe a oo ina faataunuaina ni faasalaga ia i latou e solia tulafono o le nuu.

O se isi aso na logo mai ai le ta'ita'i o loo iai se tagata o ia gaioia mea totino a nisi o le nuu. Ona faapotopoto ai lea e le ta'ita'i le nuu atoa.

"Tou te malamalama o tulafono o loo iai, e mo lo outou puipuiga saogalemu," na saunoa atu ai le ta'ita'i ma lona faanoanoa lava.

"Ua tataua ona taofi le gaioia lea. O lea foi ua faapoopo le isi sefulu ta o le sasa i le sefulu na iai

muamua, ina ia atili faamamaluina ai le tulafono."

Ae le'i uma ai lava le gaioia o le tagata o meatotino a isi aiga. Ona toe faapotopoto ai foi lea e le taitai le nuu, ma fai atu iai, "Ia outou faalogo mai, soia le gaioia. Tatou te mafatia uma ai i le mea o loo faia e le tagata gaioia lea. O lea ua tuu ai i luga le faasalaga, i le 30 ta o le sasa."

Ae le uma ai lava le gaioia o le tagata. Ona toe faapotopoto ai foi lea e le taitai lona nuu, ma fai atu, "Ua sii i le 40 sasa le faasalaga ona o le le usitai o le tagata o ia faia lenei mea leaga i lo tatou nuu." Sa vaavaai atu ma le alofa le nuu i lo latou ta'ita'i o savali ese atu i lona maota ma le faanoanoa.

Ae tamo'e mai loa ma se isi ma valaau mai, "Ua maua le gaioia." Ua potopoto le nuu e vaai poo ai. Na lagona le leo o le ofo o tagata i le vaai atu i le tagata o ta'ita'i mai. A ua punou ifo le ta'ita'i o le nuu ma le faanoanoa, ma le maligi lemu o ona loimata. Ona o le gaioia o lona tina matua, ua auivia ma

lalu sina.

O le a nei lana mea a fai? Mata o le a ia faamagalalo lona tina, pe faaoo pea le sala o sasa e 40?

Ona saunoa ai lea o le ta'ita'i o le nuu. "Le pa'ia e o lo tatou nuu," ua tete le leo o le ta'ita'i. "Na faia lenei tulafono mo lo tatou saogalemu ma lo tatou filemu. O le a faaoo lava le sala e 40 ta o le sasa, ona o le agasala ua tatou mafatia ai."

Na luelue atu le ulu o le ta'ita'i i leoleo, ona latou ta'ita'iina atu ai lea o le tina o le ta'ita'i i luma. Na tago atu le ta'ita'i ua tatala ese le ofu o le loomatua, lona tina, ma aliali ai le tua e na o ivi ma pa'u i le pa'e'e. Ona savali atu ai lea o le isi leoleo ma le sasa ua fuafua e faaoo ai le faasalaga.

A o le taimi foi lea na tatala ai le ofu talaloa o le ta'ita'i, aliali ai lona tino malosi ma ona tau'au tutu'a. Ona tago atu lea ua opoopo mai lona tina, ae u lona tua i le faaoo sala. Na ia musumusu atu upu alofa i lona tina, a o faasolo ona faitau o ta e 40, i le tua o le ta'ita'i. Ua tuu faatasi i le ata lenei le uiga moni o le alofa, ma le amiotonu.

O E UA MALILIU



Tuiavalei Epati So'o'ula Leiataua

Sa faia lona sauniga faale'aiga i le maota malii o Lugaliga i Leififi i le po o le Aso Lulu, aso 15 Oketopa 2014. Sa ta'ita'i ai le Susuga i le Faifeau Toeaina mai Amerika, le Susuga ia Saitumua Tafaioalii, o se tasi o alo o le tina ia Avalei. Na maua le avanoa o le toatele, o ana fanau, o fanau a ana fanau, ma fanau o fanau o ana fanau, e molimau ai i le soifua aoga o le tina, i la latou mafutaga. Na maua foi avanoa o nisi o faafeagaiga o e sa a'oa'oina i le Kolisi o Samoa, e molimau ai i le

soifua galue o le tina, a o avea ai o ia o se kuka i le nofotumau a le Kolisi o Samoa.

O ona sauniga amata sa faia lava lea i le fale malii o Lugaliga i Leifiifi i le itula e 7am i le taeao o le Aso Faraile 17 Oketopa 2014. Sa ou ta'ita'i ma saunia le upu faamafanafana, a o le Susuga i le Faafeagaiga (AOG) Iakopo Lele na saunia talosaga.

O ona sauniga i lona maota i Fasitoota, sa ou ta'ita'i. O le Tausi Matagaluega Metotisi, le Susuga ia Faletolu na saunia le upu faamafanafana, a o le Susuga i le Faafeagaiga (AOG) Keilani na saunia talosaga.

O ona toe sauniga, sa faia lea i le malumalu EFKS i Lepale, Fasitoota, i le aoauli o le Aso Faraile lava lea, 17 Oketopa 2014. Sa ou ta'ita'i ma saunia le molimau faaleagaga. O le Susuga ia Uta Muaulu o le faifeau Samoa i le EFKS i Fasitoota na saunia le upu faamafanafana. A o le Ti'akono Katoliko le Susuga ia Ati na saunia tatalo. O le Susuga i le

Faifeau Toeaina, le Susuga ia Saitumua Tafaioalii, le Fetalaiga ia Faleulu Samuelu Sooalo, le Afioaga ia Fuimaono Epati Sooula ma le Susuga i le A'oa'o Malua, Lefale Epati Sooula, sa fai ma sui o le fanau, e molimauina le soifua tautua ma le soifua aoga o le tina, i le latou mafutaga. Ao le Fetalaiga ia Aesa Reupena Fretton sa fai ma sui o le aiga potopoto.

O ona toe sauniga i lona oliolisaga tumau, sa ou ta'ita'ia. Ona matou faamavae atu ai lea ia te ia i le pese a le Au Kerisiano - Talofa Uso e, Tofaina oe.

O se tina matua sa maua ai le fautuaga mo le Galuega a le Atua. O se malosi faatupu malosi, e fetai'a'i ai ma faigata ma faafitauli o le Galuega.

Alu ia oe le afafine o le Atua. Oe le auauna lelei ma le faamaoni, e te ulufale i le fiafia o lou Alii.

O ia oulua ma Iesu.

Matou faamuli ma nonofo atu foi ma Iesu.

Ia manuia le malaga.

Muta Papalii (FS),
EFKS Lepale

O Pomu e Lua e Igoa ia "Little Boy" ma "Fat Man"

O le masina ua mavae na faamanatuina ai le 70 o tausaga talu ona i'u le Taua Tele Lonalua a le Lalolagi - 1939-1945.

Na i'u lea taua ina ua faaaoga e fitafita Amerika le ulua'i pomu atomika, (atomic bomb) na faapa'u ifo i le vaalele ma faapa tusa o le afe mita i luga a'e o le aai o Hiroshima, toe fai foi faapea i luga o le aai o Nagasaki, ma siilima ai Iapani.

O ia pomu na malilii ai le fia selau afe o tagata sa nonofo i ia aai. O laau ma faato'aga, o fale o pisinisi ma fale o aiga, o manu o le eleele faapea ma manu felelei. Ua 'o'ona le 'ea faapea ma le

palapala, ua vevale le suavai o vaitafe faapea ma le sami. O mea uma na faamealofa mai e le Atua mo tagata, ua faaleagaina. Tasi lava le mea na manana'o iai i latou na faapa'u'uina ifo ia pomu, o le manumalo. E le'i manatu i le ola o tagata ma le anoano o mea o le foafoaga. Ae ona o nei lava mea o taua, a tula'i mai, o tagata lava e malilii ai.

Mata o se manumalo moni le fasioti uma o le la 'autau, poo lenei foi 'autau? E tatau ai ona tatou mafaufau i le mafuaaga o taua ma fevaevae'iga, ona o tuaoi, o pulega manatu faapito, o le 'oa a le lalolagi, o le mativa o tagata, o

faiga le amiotonu, o sauaga ua le manatu ai i le ola o tagata, o talitonuga o tagata, o talitonuga o lotu.

A ua uma ona tuu e Iesu lo tatou Faaola le fua tatou te mulimuli ai, ona tatou le fe'aina'i lea ma fetaua'i - "Ia e alofa atu i le lua te tuaoi ia pei o oe lava ia te oe".

E le faigofie le fua a Iesu, a o le mea moni, e leai se isi fua e sili atu i lo lena."Love thy neighbour as thyself." E te le fasiotia le tagata pe afai e te alofa iai.

Peitai a sii taua mai le la itu, ona faapea foi lea ona tatou fai e tatou. Ua fai le taua, ma taufai fasi ai.

The Christian is not
ruined by living in
the world, but by the
world living in him.